

四庫全書

集部

欽定四庫全書

集部

全蜀藝文志卷三十七

詳校官內閣中書臣李采

侍讀臣孫球覆勘

總校官進士臣繆琪

校對官中書臣李荃

謄錄監生臣莊文焜

欽定四庫全書

全蜀藝文志卷三十七

明 周復俊 編

記

黃陵廟記節文

漢諸葛亮

僕躬耕南陽之畝遂蒙劉氏顧草廬勢不可却計事善  
之于是情好日密相拉總師趨蜀道履黃牛因覩江山  
之勝亂石排空驚濤拍岸斂巨石于江中崔嵬巒岼列  
作三峯平治洺水順遵其道非神扶助于禹人力奚能

致此邪僕縱步環覽乃見江左大山壁立林麓峯巒如  
畫熟視于大江重複石壁間有神像影現焉鬚髮鬚眉  
冠裳宛然如彩畫者前豎一旌旗右駐一黃犢猶有董  
工開導之勢古傳所載黃龍助禹開江治水九載而功  
成信不誣也惜乎廟貌廢去使人太息神有功助禹開  
江不事鑿斧順濟舟航當廟食茲土僕復而興之再建  
其廟貌目之曰黃牛廟以顯神功

諸葛武侯廟記

唐呂溫

天厭漢德俾絕其紐群生墜塗四海飛灰武侯命世實  
念大極魏姦吳輕未獲心膺胥宇南陽堅卧待主三顧  
稍晚羣雄粗定必也簞掃是資鼎立變化消息謀成掌  
中龍戰玄黃再得雲雨于是右揭如天之府左提用武  
之國因山分力與水合勢蟠亘萬里張為龍形亦欲首  
吞咸鎬尾東河洛翼乎中夏飛于天衢然後魚驅勾吳  
東入晏海大勲未集天奪其魄至誠無忘炳在日月烈  
氣未散長為風雷英雄痛心六百年矣於戲以武侯之

才知己付託土雖狹國以勤儉富民雖寡兵以節制強  
魏武既沒晉宣非敵而我車荐駕不復中原或曰竒謀  
非長則斬將覆軍無虛舉矣或曰餽糧不繼則築室反  
耕有成筭矣嘗試念之頗賸其原夫民視德以為歸撫  
則思虐則忘其思也不可使忘其忘也不可使思當漢  
道方休哀平無罪王莽乃欲憑戚寵造符命脅之以威  
動之以神使人忘漢終不可得也及高光舊德與世衰  
遠桓靈流毒在人骨髓武侯乃欲開季世振絕緒諭之

以本臨之以忠使人思漢亦不可得也向使武侯奉主  
之命告天下曰我之舉也匪私劉宗唯活元元曹氏利  
汝乎吾事之曹氏害汝乎吾除之俾虜魏偪從之民聳  
誠感動然後經武觀學長驅義聲咸洛不足定矣奈何  
當至公之運而強人以私此猶力爭彼未心服勤而靡  
獲不亦宜哉乃知務開濟之業者未能審時定勢大順  
人心而克觀厥成吾不信也惜其才有餘而見未至述  
于遺廟以俟通識唐貞元十四年七月一十五日記

諸葛武侯祠堂記

裴度

度嘗讀漢史詳求往哲或秉事君之節無開國之才得  
立身之道無治人之術四者備矣兼而行之則蜀丞相  
諸葛公亮其人也公本系在簡冊大名蓋天地不復以  
云當漢祚衰陵人心競逐取威定霸者求賢如不及藏  
器在身者擇主而後動公是時也躬耕南陽自比管樂  
我未從虎時稱卧龍詩曰潛雖伏矣亦孔之昭荊州平  
心與玄德神交洎乎三顧而許以驅馳一言而定其機



勢于是翼扶劉氏續承舊服結吳抗魏擁蜀稱漢政刑  
達于荒外道化行乎域中誰謂阻深殷為強國誰謂輕  
脆勵為勁兵則知地無常形人無常性自我而作若金  
在鎔故九州之地魏有其七我無其一由僻陋而啟雄  
圖出封疆以延大敵財用足而不曰浚我以生干戈動  
而不曰殘人以逞其底定南方也不以力制而取其心  
服震懾諸夏也不敢角其勝負而止候其存亡法加于  
人也雖死而無怨德及于人也雖奕葉而見思此所謂

精義入神自誠而明者矣若其人存其政舉則四海可  
平五服可傾而陳壽之評未極其能事崔浩之說又詰  
其成功此皆以變詐之畧論節制之師以進取之方語  
化成之道不其謬與夫委棄荊州不能遂有三郡此乃  
務增德以吞宇宙不黷武以爭尋常及出斜谷據武功  
分兵屯田謀久駐之計與敵對壘待可勝之期雜乎居  
人如適虛邑彼則喪氣我方養威若天假之年則繼大  
漢之祀成先主之志不難矣且權傾一國威震八紘上

下無異辭始終無愧色苟非運膺五百道冠生知曷以  
臻于此乎故玄德知人之明者倚仗曰魚之有水仲達  
奸人之雄者嗟稱曰天下奇才度每迹其行事度其遠  
心願奮短袖以排羣議而文字雖鄙志願未果元和二  
年冬十月聖上以西南輿區寇亂餘孽罷盪未息汚俗  
未清輟我股肱為之父母乃詔相國臨淮公由秉鈞之  
重承推轂之寄戎軒乃降藩服乃理將明帝道陬落綏  
懷溥暢仁風閭閻滋植府中無留事宇下無棄才人知

嚮方我有餘地則諸葛公在昔之治與相國當今之政  
異代而同瀆矣度謬以庸薄獲叅管記隨旌旗而爰止  
望祠宇而修謁有儀可象以赫厥靈雖微烈不忘而碑  
表未立古者或拳拳一善或師長一城尚流斯文以示  
來裔況如在之嘆終古不絕其可闕乎乃刻貞石庶此  
都之人存心拜之感云爾銘曰

昔在先主思啟疆宇擾攘靡依英雄無輔爰得武侯  
先定蜀土道德城池禮義干櫓煦物如春化人如神

勞而不怨用之有倫柔服蠻落鋪敷渭濱攝跡畏威  
雜居懷仁中原盱食不測不克以待可勝允臻其極  
天未悔禍公命不果漢祚其亡將星中墮反旗鳴鼓  
猶走司馬死而可作當小天下尚父作周阿衡佐商  
兼齊管晏總漢蕭張易代而生易地而理遭遇豐約  
亦皆然矣於戲竒謀奮發美智天遏吁嗟平立咸受  
謫罰聞之痛之或泣或絕甘棠勿翦駢邑斯奪繇是  
而言殊途共轍本于忠恕孰不感悅苟非誠慤徒云

固結古栢森森遺廟沈沈不殄禋祀以迄于今靡不  
駿奔若有照臨蜀國之風蜀人之心錦江清波玉壘  
峻岑入海際天知公德音元和四年記

忠武侯祠堂記附

宋張震

漢昭烈以區區一隅當天下三分之二恃有忠武侯而  
已自操敗赤壁昭烈始收江南以侯督零陵桂陽長沙  
三郡及昭烈入蜀侯鎮荊州率張飛趙雲泝江而上與  
昭烈會以成平蜀之功其後永安受命歲在往反則瞿

唐控扼經營之地侯豈特有意于此哉今八陣故基不  
溺于波流而卧龍屯營乃不復見按晉永平中卧龍始  
以山名唐夔州治白帝廟于西郊杜少陵所謂卧龍無  
首對江濱者也不知自何時併為寺寺故有祠又不知  
自何時已失之矣侯平生所眷眷者神物且知護之顧  
人獨不然予是以有感焉盖天下之才不乏其卓然特  
立功名之會者固有之矣至責以大人之事則凜然如  
恐不及惟所志狹所施陋也三國鼎立爭天下漢號最

弱昭烈戰每不勝而四海之義皆歸之吳孫氏以江東  
伯人材視漢魏為多其取江陵破猗亭功最俊偉然知  
摧其與而忘用之敵謀蜀則巧謀魏何拙也關羽在荆  
州攻曹仁于樊操議徙都避之此何與吳事而權寧屈  
于魏請取羽自效乎彼其志不在天下明矣昭烈以羽  
故用師于吳兵敗身困摧沮以死蜀之君臣父子讎吳  
當益甚而若直置不問此豈愨然真忘吳者哉顧所讎  
者大魏窺神器而竊取之其罪與吳孰重使蜀日夜唯



吳是圖則魏偷得自安或者持刺虎之術乘吳後是代  
魏受禍也嗚呼侯經營天下之略其規模意度與吳相  
絕如此邪世徒知周瑜呂蒙陸遜破三大敵功在當世  
鮮儷而侯不過拒司馬懿渭上而止其烈若少貶焉然  
百世而下望其品以為三代人物者惟侯實當之數君  
子蓋不與也此所謂大人之事豈勉強用力所能致乎  
三國距今向千載其事之成敗得失人類能言之而吳  
人于數君子未始有禋享者侯于蜀迺特厚蓋自當時

固有巷祭野祀者矣朝議以禮不聽卒不能禁迺聽立廟沔陽其傳至今夔州豈獨忘之侯故第在成都像設甚偉望之儼然猶可想見風烈予始命卧龍寺僧慧璉為侯創祠且繪其像以慰國人之思而紀其大畧使復有文中子者觀之當以予言為然隆興甲申日南至右承議郎充敷文閣待制知夔州軍州提舉學事兼管內勸農事充夔州路兵馬都鈐轄兼本路安撫司事賜紫金魚袋張震記

移建武侯祠記

王十朋

武侯故祠在州之南門沿城而西三十六步無斷碑遺刻以考其歲月之始見于圖經者略焉在隋唐時稱白帝城杜少陵詩曰西郊諸葛廟者其地于茲乎十朋莅事之初謁焉徘徊四顧敬想風烈歎廟貌之不稱它事未遑也首葺而新之且書其事于石矣然地卑巷隘混以民居汙渠糞壤溷乎其間臭朽之所蒸蝸蟻之所家非所以妥靈而崇祠也門之東去祠一百八十五步城

有臺下臨八陣圖登臺而望則常山之蛇四頭八尾之勢宛其在目北直郡倉倉故永安宮也據塹狀如屏宮之北有水曰清瀼瀼出乎兩山之間東入于江又東過灑瀨入于峽峽口有山卓然立乎羣峯之外者白鹽也可謂江山之勝矣侯昔經營天下于平沙之上輸忠盡誠受遺立孤于是宮之中江流洶而石如故宮闕廢而地猶存陵谷雖變而精神不亡宜于兩者之間祀之亦侯之志也遂與同僚謀而遷焉地初為節度推官宅

徙于它所因其址築而高之用其材斷而新之為堂五楹廡萬椽南門于臺又門于西通往來之道像仍其舊新厥丹青冕服用侯又塑關張像翼于左右故祠以婦配非禮也別為室以奉之書史傳于壁之左而削其不公之論書少陵詩于壁之右以諸作者詩文次之乾道三年四月壬午告成詩以祠之詞曰

白鹽峙天兮灩澦屹江風雲慘澹兮翱翔卧龍龍千秋兮何之新廟貌兮江之湄前八陣兮後故宮龍兮龍兮

神其中望昭烈兮隔清灤遺廟存兮交精神于恍惚駕  
虛空兮雲為馭臣東朝兮主西顧魚得水而相忘兮事  
無今古儼闕張于左右兮一龍二虎祠有新故兮侯無  
重輕舍其故而新是卜兮邦人之情祠合于圖兮自今  
始事祀不絕兮有如此水

城隍廟記

唐段全緯

陽之理化任乎人陰之宰司在乎神人保于城城保于  
德德者神所憑依也則都邑之主其城隍神之謂乎蜀

地土惟塗泥古難版築至秦惠王始命張儀與蜀守張  
若城成都其環十二里其高七十尺解署廛里畫其下  
井幹樓櫓森乎上其金椎初作壤頽莫就有大蔡周旋  
而行俾壘堵依準而立即今城也其神功乎由此而來  
乃墉洫崇濬啟塞局固萬雄邈迤一都繁會臣明支侍  
金湯繕完故前年蠻寇卒來戎備無素但擾郊鄙不近  
闔閭閉關戒嚴即時罷退則扶傾捍患之力其陰靈幽  
贊之神乎前之舊祠寓託隈傑偏陋偪隘歷歲滋深是

用改度方隅惟新經構去乎幽奧就于高明其日惟丙戌其辰惟己其卦直巽其宮在西揭署于高門弘敞于正堂丹雘于周墉圖績于迴廊廟貌如生像容有睟神保是饗永安定位俾夫農無水旱人不夭札屏絕蠻夷阜安閭里護乎封域富庶乎億年爰書經始以昭祀事

南瀆大江廣源公廟記

李景讓

戴禮有之曰五嶽視三公四瀆視諸侯古之禮于嶽瀆尚矣在昔夏后氏隨山濬川以畫九州華陽黑水界我



庸蜀劔閣之陽益部饒焉岷山導江東別為沱禹績也  
瀆者曰江曰河曰淮曰濟導積石桐柏沅水凡四流皆  
發源注海者也唐天寶六載開元神武皇帝加封南瀆  
為廣源公其三者亞焉漚沛瀉汙自峽奔荆且北直東  
百川會同爰及吳楚萬里歸海水府怪神非江不安水  
物族生非江不全海門二山逆我為滄由岷激沱遠邁  
無壅斯所謂祇上天而被下土南瀆之為大也壯矣開  
元皇帝古禮是式詔曰惟夏四月肇辰迎氣太守其率

祭官祀南瀆于益州設玉篚及洗罇壘簋簠既舉洎于  
獻祝進神右跪揚我詞其文曰

維某年歲次某某月朔嗣天子遣某官某昭告于南瀆  
大江惟神包孕百川朝宗于海光昭潤化德表靈長今  
因夏首用率舊典敬以玉帛犧牲粢盛庶品明荐于神  
尚饗至于今不衰詔之歲歲直丁亥距戊寅當大中十  
二年合一百一十有二歲越五月朔辛酉日子小臣景  
讓承聖敬文思和武光孝皇帝詔自御史大夫檢校吏

部尚書成都鎮蜀西川又五日戊寅復加檢校尚書右  
僕射其他如故凡再命皆以兼御史大夫寵焉秋七月  
庚午乘輅至止遂謁瀆廟惟神盛德刻諸金石仰瞻棖  
桷靈爽斯在神惟奉大禹之休得蠶叢魚鳧望帝之勲  
鼈靈之濬三峽李冰之穿二江嘉而保之沃此黎首水  
旱不虞于今賴之赫哉成功其可沒耶乃作銘曰

滔滔沱江發自岷山浪溢流飛走峽之荆迨及吳楚  
百川以歸南北東西萬里湯湯電激雷馳水府神宅

鮫人陽侯世不可窺南瀆之功載主載張陰烈希夷  
上戴大禹丕承我唐開元其期先主不造天絕劉宗  
匪瀆殆而泐泐孔明鞠躬墮星匪瀆不悲念此下民  
於萬斯年九穀繁滋我来守土敬揚神休以琢豐碑

新修江瀆廟碑

宋蘇德祥

五行迭用水實居多四瀆朝宗江惟其長八卦之畫也  
坎之又冥契北方之數水實主之二儀之判也岷之山  
騰為東井之精江實出之惟堯之世斯水未治遂有昏

墊之虞以嗟方割惟禹之興斯江既道故有納錫之貢  
以示成功其利萬物也大不可極深不可測而靈潤之  
功著焉其納百川也則察之無象尋之無邊而靈長之  
德昭焉昔者三國連衡吳人擅命六朝割據陳氏稱雄  
及晉祚之隆也下樓船于玉壘隋基之盛也進戈甲于  
金陵降孫皓則濟為安流擒叔寶則寂無駭浪得非有  
道則應無道則否威靈不昧胥蠻斯在若乃方軌十二  
惟帝之都邑勝兵百萬惟帝之爪牙非富庶無以示國

威非漕運無以資邦計語其順流而下委輸之利通西蜀之  
寶貨轉南土之泉穀建帆高挂則動越萬艘連檣直進則脩  
踰千里為富國之資助經邦之略此又妙不可盡之於言  
事不可窮之於筆也當隋之開皇二年文帝以沈祭之缺  
禮乃營之以廟貌唐之天寶六載玄宗以廣源之美號  
爰封之以公爵而自梁室暴興蜀人僭命王氏則起之  
于前孟氏則繼之于後或征或戰越四五朝稱帝稱王  
垂七十載化風久隔祠典莫修應天廣運聖文神明

道至仁孝皇帝握乾樞而御極弔坤維而問罪聊施良  
策纔舉偏師未越六旬已平三蜀既而王道坦泰階平  
四夷八蠻有跋扈者盡為臣妾矣名山大川有隔越者  
盡入提封矣爰伸昭謝用酬玄貺乃下明詔徧立嚴祠  
有司承制繪樣于素頒之于所部長史祇命官箴其事  
取之于大壯土木盡其妙丹獲窮其利儻功斯畢列狀  
以聞我其潔籩豆馨黍稷永享神以明德神其助造化  
和陰陽潛祐我之治世式覃睿旨俾建豐碑臣敢頌皇

猷刊之翠琰豈比夫沈于江底杜元凱惟尚功名賦彼  
江流郭景純但矜詞藻而已哉銘曰

江之源兮出蜀之界江之流兮歷吳而大利萬物于  
南方納百川而東會嗟乎盜發于唐兵起于梁神之  
祀兮以廢烝嘗美哉我宋之昌彼蜀之方神之廟兮  
復構棟梁我其享神以蠲潔神其祐我以豐穰勒銘  
垂裕休無與疆

郫縣蜀叢帝新廟碑記

張俞



水于五行為利害最大四瀆為之原水而江又為四瀆  
之長其為利害益大矣昔洛水警堯天下昏溺江實為  
暴民受其害帝乃命禹決江疏河東放于海則天下受  
其利然後受舜禪讓終陟元后功配天地德被萬世自  
水始也故孔子修書述禹之事尤勤備焉繼而歎曰禹  
盡力乎溝洫吾無間然矣劉定公亦曰微禹吾其魚乎  
然聖人之功大而易法簡而易循因時致治必通其變  
厥後千五百年蜀有開明氏能振其道故禹之功復興

焉在昔蜀有賢主曰望帝獲楚人鼈靈以為相當是時  
巫山龍戰崩山壅江水逆襄陵蜀沈于海望帝乃命鼈  
靈鑿巫山開三峽決江沱通綿維合漢沔濟荆揚然後  
得陸處人保厥命望帝以其功高讓位而去鼈靈遂  
稱叢帝號開明氏襲郡於邛故蜀人誦先王功者以開  
明氏比夏后氏焉其後三百年秦強伐蜀命其臣李  
冰為守是時江妖為暴沫水淫流沃野歲災民受其害  
冰乃誅水妖通水道鑿二山醜二江灌溉千里變凶為

沃人賴其利故史氏美冰之功于蜀為大自冰沒後千  
五百載其功益彰焉大禹大聖人也智極于水用能因  
天順地永生厥民若叢與冰道不行于周秦而能迹禹  
之功厚利二蜀非有大賢之業安能至此天水趙公曰  
予觀蜀之山川及其圖記能雄于九丘者蓋乘成水利  
以富殖之其國故生生不窮然非開明氏則巴蜀魚其  
民淮漢汙其澤湮禹之力遺後之患憂可弭乎其後復  
得秦守之事謂其功出開明氏之下而蜀人獨神冰之

廟祀史氏雖載冰之後功反使紹聖之烈闇而不耀世祀湮滅予甚懼焉蓋所謂日用而不知遂忘其本矣按禮祭法聖王之制祀功施于人則祀之能禦大災則祀之能捍大患則祀之若開明氏可謂功施于人能禦大災能捍大患者也予適治茲土而壠墓在邑之南彼民無知古闕祭享非所謂遵明詔存功烈者也康定二年春二月五日始作新廟成益州牧樂安公命辭來祭趙君乃躬執祀事會民吏以享之衆始大悅趙君名可度

字叔儀治耶有稱觀其所舉可知也銘曰

江發坤險堯憂懷襄夏后瘠力其流洋洋巫龍崩山  
江沈蜀疆開明疏鑿民復其常外通淮漢內殖岷梁  
利盡西海實惟華陽聖聖同功千載合符微聖之力  
蜀其魚乎江陽之腴耶惟舊都丘墳巍岌拱木號呼  
血祀不作神何以居新廟奕奕牲牢孔碩民享其文  
神歆其質舊功克照大患所逃不有博雅孰躋聖匹  
載德者言永厥金石

大禹廟記

計有功

聖法天以身任道天作聖以地發祥舜生于諸馮文王生于岐周生異地而治同功乃知上天為生民挺生神聖有開必先皆非偶然者崧高長發流播雅頌推原本始蓋示萬世以不可忘也方冊所載禹生石鈕古汶山郡也崇伯得有莘氏女治水行天下而生禹于此稽諸人事理或宜然因人事以驗天心其可考者禹功自汶河圖括地象曰岷山之精上為井絡帝以會昌神以建

福太史公本紀謂岷為汶故曰汶岷山導江岷嶓既藝  
天生聖人發神于此而萬世之功亦起于此其可忘哉  
然而自汶山西山柑江崎巫鈴廟絕簫鼓魚菽猶為俚  
人之社汶以東至于石泉雖縉紳未嘗言之嘗求其故  
大抵山川曩邈代遠時移郡邑名號廢置離合而石紐  
故處莫適主名秦漢而下為國曰冉駹為道曰綿虜為  
邑曰廣柔其實一也漢靈帝析而郡之曰汶山後周又  
析而邑之曰汶山唐貞觀八年又析而縣之曰石泉唐

以前石泉之名未立譙周陳壽皇甫謐皆指石紐為汶  
山之地周曰禹生于汶山廣柔之石紐其地為劔兒坪  
壽曰禹生汶山石紐夷人不敢牧其地自石泉之名其  
後唐地理志國朝職方書先儒輿地記皆以石紐歸石  
泉雖莫辨其故然汶山之山曰鐵豹沔水出焉汶山之  
山曰玉壘湔水出焉石泉之山曰石紐大禹生焉合之  
則一離之則散處于三邑之近無可疑者石泉始隸于  
茂國朝熙寧割隸于綿政和撫戎又陞而軍之禮樂文



物日浸月長且謂石紐夷地置而弗論太守趙公元勳  
世以笑談坐鎮披謀考古將廟祀禹而疑論未釋郡士  
計有功版曹尹商彥多聞博雅繹究數千年事燦如日  
擊廟議遂決卜郡左四百舉武比倚層峰江自西來雷  
奔箭駐發滙于廟下如及本念德大淵洄翔舞迤邐遶  
出如朝宗得途廟以門計一十有形麗勢勝神明擁會  
涓剛落成乃烹乃奏芬芳璀璨禮薦樂徹縉紳耆老手  
抃情激勸九叙之歌歎明德之遠賢哉禹功于是乎大

乃以圖以書以學官李繁暨尹君之文屬記于有功或  
曰士有一方盡一節論封廟食千里襁負無有誓命如  
加明刑禹功絕德誰不闕享而闕

廟之功無闕

無名禹無闕

由焉而不知所以為絕德也

夫使人之靈畏禍于尸祝之間則何以為禹然惟功大  
德盛故稱神禹末世乃取臆地咨祈闕 計河伯示

圖滄水援簡茅怪幻而神之至其祠祀則巫記胼胝之

云鳥耕山陰之冢漢祈開母之石晉享黃熊之厲由是

觀之

闕

于

闕王汶川之民祠禹

闕

汶玉石紐置而

弗論無足怪者

闕

曰禮也者反本修古不忘其所由生

越之人曰吾禹之會稽楚之人曰吾禹之宛委思其人

寶其地使汶之人不曰吾禹之石紐是不知天降神地

發

闕

賴也公一舉三善皆得且遐方遠古而惓惓然

其在今日遠矣報上之心為何如哉宜請于朝崇載祀  
典以陟偉績于靈源耿休光于遐裔惟禹之神彌天地

布六合于是為反本之祀繫之詞曰

有汶惟山誕生帝禹汶水發源降神之所帝指其處  
以啟神功厥土既敷四海會同蠢蠢羣生茫茫萬古  
豈享其利而忘其故石紐山名石泉之虛近在耳目  
詎迷厥初禹色山融禹聲汝注長發其祥地靈常聚  
地秘其靈朝烟夕霏粵歲三十公其發之乃涓乃卜  
乃朝乃祀報本反始此方斯址大江西來如揖如頤  
且路朝宗洋洋東去惟公承宣德感化行咨詢民瘼

究民之生民生于禹禹生于此廟則咫尺心兮遠矣  
公推是心以仁昌時以撫民夷神人是依前乎數千  
年其愧于斯後乎億千年其作于斯

荆建有夏皇祖廟記

張玠

至神長存大功必報廟而祀祀而歆亘千萬載顯顯注  
人心目是崇是敬是興是奉斯不有主張綱維之自邪  
開闢之初三靈未奠五行猶汨時則洪水橫流懷襄滔  
天民用昏墊弗協厥居惟大禹以神智承命俾乂克底

平成之功迹其乘四載別九州刊木濬川導江決漢櫛  
風沐雨手胼足胝八年于外而後澤者道陵者藝人得  
平土以居六府孔修三事允治餘風遺澤至于今賴之  
則所以報之宜何如春秋時劉定公館于雒汭猶思禹  
之功德且有微禹吾其魚乎之歎矧茲夔門當四蜀川  
流之聚合數百源而委之沆漭汜濫又其他所而巴岡  
巫嶠崔嵬盤錯辟立骨峙懸亘峻極固塞其衝奔潰洶  
漏之勢艱虞為力哉已而瞿唐瓜分灩澦孤蹲千崖蕩

磴兩兩却立黃流巨浸帖帖東下環數千里之地既宅  
既旅既蠶既粒孰知疏鑿功用之至于斯耶有唐杜少  
陵詩以史名寓夔日一吟咏不忘其本若曰禹功翊造  
化曰禹功饒斷石曰江流思夏后之類言意諄複殆不  
可悉數是其感慨景仰之情發為聲音有不能以自己  
後之志于時者至此詎得無所懷哉歲己酉玠被命將  
漕夔門居無何復攝郡事率職之外于修廢興闕竊有  
意而未遑也未幾前制帥趙公以書來言夏后平水之

功與天地並今江淮河漢間咸知奉祀夔門䟽鑿之力  
尤艱大而廟貌獨無何以示報本之意蓋亟圖之僕因  
考前代有少遺烈在茲土者率有祠奉顧后之不績冒  
六合而導江至斯功尤顯茂迺獨無享祭之地誠大闕  
典于是始為勦建謀乃于江滸之白帝城得隙地十畝  
高明虛曠控瞿唐而臨灩澦厥土燥壤勢面陽議以築  
曰宜哉則命討工役事材用既集未及作而今帥長單  
公寔來交郡章迺相與言是事且以營造囑之尋以卜



龜未食更歲始得出幣僦工衆役皆作凡為殿約門及廊廡之屬合百楹乃塗乃聖乃設貌像器用從給不陋不華俾爾邦人與夫來者有以為瞻依享祀之所而其明明之德猶足以令江神而濟舟楫也昔人論廟祀以為德厚者流光德薄者流卑故有萬世之功斯享萬世之祀乃今廟貌之設夫豈荒忽迂誕而莫可質信哉繼自今荐而馨香實而恭敬肩袂相屬于廟庭者雖至于無窮可也

杜宇鼈靈二墳記

陳臯

戰國時蜀災昏墊杜宇為蜀主不能治舉荆人鼈靈治之水既平乃禪以位死皆葬于郫今郫南一里二塚對峙若丘山獨鼈靈墳隸淨林寺寺僧夷其崇為臺觀隱士張俞懼其遂湮沒請于郡而碑之因置祠其上與杜宇岡勢相及宇之墳尤盤大民菑畬之其來遠矣皇祐壬辰春淨林僧死寺籍為田許民墾畝而鼈靈墳與寺俱化為民畝張俞聞之建言于縣尹虞曹外郎郭公公

愀然動色駕而省之明日進士杜常等五十八人以狀  
理于庭公報曰昔日七國相血生民肝腦塗地獨杜宇  
亡戰爭之競有咨俞之求以拯斯民雖鼈靈成洪水之  
功微宇不立議其賢則杜宇居多載其烈則鼈靈為大  
二人嗣興其舜禹之業九之一焉况勤民禦災皆載祀  
典微此則古之聖賢暴于原莽而吾不之知矣于是具  
不可籍之議聞于郡郡嘉其請俾復其寺訪名僧以主  
之得景德寺禪者垂白焉白好靜退能禪寂邑人所嚮

仰公于是命之因盡域二墳隸于寺命刻石志其事庶  
來者知二人有大造于西土宜與惠無窮皇祐四年九  
月二十四日記

靈泉縣聖母堂記

蘇惲

靈泉邑北直嚮馳道俯僅一舍地聚落帶鎮市去市徑  
行越距半里拔秀衆山環列崇阜遭迴崑嶺瞰若百雉  
城隅崦岑繚滙崛竦天外繇亘固護高揭雲表由其峰  
半挺設平崗健盤壯垣方秩千步中構佛宮領僧刹迨

百室有古褚氏聖母祠堂在焉謹按隋開皇中褚氏名  
曰信相自江都來本唐安郡青城縣黑水溪人也黃冠  
草帶幼悟佛心葛帔練裙夙叅法要先遊方外首卜此  
山端擇勝址芟薙芒枿科樹枯柏塵初地之位創安居  
之漸偃息禪梵韶祕聲味勤事大雄氏教本為空寂師  
表日遞月進精一無怠當時所聞見者亦未甚悉而奉  
之適值歲歉田稼民傷飢饉則持龍頭小鐺散粥而飼  
之救拯生聚衆給千萬活病克疲咸告豐飫厥後以圓

明相空俗身委化奉之者指其故地置祠塔以歸其靈  
俗議習傳號曰米母院俄屬唐武皇會昌歲削廢天下  
寺宇斯院與塔亦例除毀時草闕皇太中九載白丞相  
敏中按節右蜀首謀興建尋得法潤禪師主之仍訪遺  
基再歲能事揭崇構堂毀廊廡牙閣闕室之備咸與惟  
新就刻舊塔石繪其遺像遂設祠焉逮咸通中悟達國  
師知元由長安來觀兩蜀名地寓此僑隱亦繼住持因  
題為聖母院其山亦從而名之唐室下衰荐經王母兩

世胙土僭朔期地靈異之應愈新于人救旱乘時灼示  
為霖之兆拯民布惠尤司及物之仁神變屢聞曾無曠  
歲炎宗大中祥符二歲府主密直任公中正聆其顯迹  
拜章上聞願錫名額未幾詔下院新瑞應之號至寶元  
慶厯皇祐之初亢閔時澤蜀土邁厲府主密直張公逸  
楊公日嚴相同文公彥博端明楊公祭畢諭將校就堂  
祭請置府佛廟設鐘梵焚獻以祈之匪夕而應甘澍決  
于百里之外農稼稔字蕃固秋成享大年之望洎三殿

省丞潘公洞徐公汾劉公永咸出宰是邑軫民告雨來  
拜祠下皆獲祥應著文賦詩大誌其異邇後動越兩蜀  
走巴邛絲綿漢梓遂列郡縣鎮凡屬愆旱奔來千里請  
禱于前動皆協應章章然以願從人其神化之若是與  
夫包山奠宅庸列聖姑之名崧岳升高亦著啟母之祀  
可並駕而議其明効祠前舊刊李唐大中時朱道異撰  
記辭旨異懦頗肆誣誕尤不可詳究觀其統載初院時  
禩禱雨應祈之狀咸闕如也院僧惟膺懼其故事湮廢



因集其本末請序而申之貴乎聖母之遺烈斯院之所  
以興盡傳于時不泯余故執筆為錄其實

新繁縣新建靈應廟記

周良翰

昔晉楚治兵子玉夢河神求瓊弁玉纓子玉弗與晉果  
敗楚師楚人歸咎子玉苻堅寇東南會稽王道子以威  
儀鼓吹求助鍾山之神奉以相國之號及堅北望八公  
山見草木皆類人形若將赴敵者頗有懼色遂以百萬  
之師敗于淝水河神以瓊弁玉纓敗楚師此固不足道

而鍾山之神受相國之封然後助晉師吾亦少之惟我  
英顯武烈王自東晉以來逮于有宋功德卓然靈異昭  
著鏤之金石殆不可以一二數蓋助順福善不煩祈禱  
除邪討逆捷若影響方黠虜憑陵中原塗炭河朔河東  
陝西百餘州盡為賊有兵驕乘勝欲來寇蜀者屢矣率  
皆及門逡巡而不敢進夫三路甲兵非不勁也山川形  
勢非不險也獨我四川晏然無虞且為朝廷中興根本  
雖一時將帥盡忠士卒用命以三路較之蓋有非人力

所能致者實神之威力是賴以今準古豈可與鍾山之  
神同日而語哉宜國家崇極封爵蜀人嚴侈廟貌以奉  
祠事盡誠致敬而不敢後也良翰承乏邑事且將及年  
一夕夢冠而法服者甲而持斧者雖在夢中意其為神  
君勇義侯也乃亟下氣斂神而拜之而披甲者引導指  
殿宇廊廡有未就處俄而寤驚駭汗遍體明日語同寮  
皆云神君祠宇雖因神霄廢宮然未就者十之四五豈  
有待耶時予方董役灌口相繼部糧益昌盖未暇也將

行之夕忽迷悶委頓闔縣之人驚曰前數日神降而附語于人曰吾今所居之殿舊嘗奉安玉皇縣令有意為吾改建特不肯出一言耳更數日當自知之今令如此乃知前日之言不妄于是數千百人奔走祠下相與燎香再拜而禱之曰若縣長無恙即士民盡力營建如神之意予俄頃復蘇自此邑人咸願移建乃相與卜地而未得也一日法要院僧繼文有言曰院旁有隙地為人睥睨久矣願捨為神君廟基冀絕爭訟時衆議紛然莫

知孰從神忽現于所指之地衆謹呼曰神意在此不可  
違也其議遂定然深溝丈餘主事者頗以為憂無何邑  
民三十一鄉鳴鼓結社千百為羣來助土工者源源不  
絕不閱月視平地增高五尺于是富者出財壯者出力  
巧者出技各捨所有以答神休又有分任廟事者二十  
餘人或主營造或掌出納皆邑中好事者也經始于紹  
興四年三月落成于五年之春廣殿長廊挾以樓觀旁  
有翼殿後有寢堂更衣受釐咸有室處共八十五間清

溝橫于前大江繚于後喬木脩竹映帶左右氣象雄偉  
稱王者之居凡自外來莫不咨嗟歎息曰壯哉麗矣敏  
矣非良邑宰孰使然哉方今征役日繁賦斂百出為邑  
令者但知從事簿書期會間曾何惠愛以及民予視邑  
人厚顏多矣何以使人樂從勸成如此之速乎得非神  
之功烈昭著威靈赫然人自歡趨蓋非有司所得而與  
也落成之日民大和會士女聞咽簫鼓沸天自是駿奔  
走執豆籩者無虛日不獨繁上之人也有士人王孝友

者自成都挈其家奉三牲之祭于祠下且語人曰予有夙志本詣九曲山忽夢神君若相告戒曰吾今在繁上無勞遠去謹遵神言是以來此且神之功德施于宗社及于生民所在有祠宇而云居于繁上豈樂斯廟之得其地而安于此耶抑亦鑒邑人奉事之勤而少留也廟成之初予適授代而去邑中士人每有書至未嘗不以廟碑為請且曰邑人因公崇建此廟其何以辭耶乃為記其興建之由復作迎享送神詩三章系于其後俾繁

人歌以祀焉

神之來兮自帝所百靈導從兮前歌後舞駕風馬與  
雲車兮和鸞鏘而翠旌舉將揮斤于八極兮忽弭節  
乎此樂土新宮之壯麗兮聊逍遙而容與其一

壽宮啟兮白玉堂奏鈞天兮酌瓊漿蕙肴蘭烝兮荐  
以蘋藻神歡欣兮載色載笑昇斯人兮樂康千秋萬  
歲兮俾民不忘其二

神之去兮我心悲乘迴風兮載靈旗電掃妖氛兮海



波澄靜疵癘不作今年穀順成保我國祚兮亘千萬  
祀吾人報事兮有隆無替其三

時紹興丙辰中秋日記

神女廟記

馬永卿

永卿自少時讀文選高唐等三賦輒痛憤不平曰寧有  
是哉且高真去人遠矣清濁淨穢萬萬不侔必亡是理  
思有以闢之病未能也後得二異書叅較之然後詳其  
本末今按禹穴紀異及杜先生墉城集仙錄載禹導岷

江至于瞿唐實為上古鬼神龍蟒之宅及禹之至護惜巢穴作為妖怪風沙晝暝迷失道路禹乃仰空而歎俄見神人狀類天女授禹太上先天呼召萬靈玉篆之書且使其臣狂章虞餘黃魔大醫庚辰童律為禹之助禹于是能呼吸風雷役使鬼神開山疏水無不如志禹詢于童律對曰西王母之女也受回風混合萬景鍊形飛化之道館治巫山禹至山下躬往謁謝親見神人倏忽之間變化不測或為輕雲或為霏雨或為游龍或為翔

鶴既化為石又化為人千狀葱葱不可殫述禹疑之而問童律對曰上聖凝氣為真與道合體非寓胎稟化之形乃西華少陰之氣也且氣之為用彌綸天地經營動植大滿天地細入毫髮在人為人在物為物不獨化為雲雨王母之女者則有合于坤為母兌為少女之說所謂變化不測者則有合于陰陽不測妙萬物之義豈不灼灼明甚哉易之為書與莊子多有合易者陰陽之書以九六為數而南華開卷已有南鵬北鯤九萬六月之

說槩可見矣又莊子所載藐姑射之神人大似今之神女是其言曰肌膚若冰雪則有合乎金行之色綽約若處子則有合乎少陰之氣遊乎四海之外則可見乎神之無方使物不疵癘而年穀熟則又見乎秋之成物故郭象注云夫神人者即今所謂聖人也斯得之矣僕因悟易之少女莊子之神人郭象之聖人今之神女其實一也僕然後知神女者有其名而無其形有其形而無其質不墮于數不囿于形無男女相出生滅法故能出

有入無乍隱乍顯舉要言之乃西方皓靈七氣之中少  
陰之靈耳豈世俗所可窺哉且楚辭者文章之大淵藪  
也而屈宋為之冠故離騷獨謂之經此蓋風雅之再變  
者宋雖小儒然亦其流亞自兩漢以下未有能繼之者  
今觀文選二賦比之楚辭陋矣試並讀之若奏桑濮于  
清廟之側非玉所作決矣故王逸哀類楚辭甚詳顧獨  
無此二賦自後歷代博雅之士益廣楚辭其稍有瓜葛  
者皆附屬藉惟此屢經前輩之目每棄不錄益知其雁貝

矣此蓋兩晉之後膚淺鮪生戲弄筆研剽聞雲雨之一  
語妄謂神女行是雲雨于陽臺之下殊不知雲雨即神  
女也乃于雲雨之外別求所謂神女者其文踈謬可笑  
大率如此僕今更以信史質之懷襄孱主也與彊秦為  
鄰是時大為所困破漢中轢上庸獵巫黔拔郢都燒夷  
陵勢益駸駸不已于是襄王乃東徙于陳其去巫峽遠  
甚此亦可以為驗也且文選雜偽多矣昔齊梁小兒有  
偽為西漢文者東坡先生止用數語破之何況戰國之

文章傑然出西漢之上豈可偽為哉噫峽之為江其異  
矣乎遠在中州之外而行于兩山之間其流湍駛而幽  
深故無灌溉之利若求之古人是蓋遠遁深居之士介  
然自守利不交物若鮑焦務光之徒今吾儕小人迺敢  
浮家泛宅沒世窮年播棄穢濁日夜喧闐其罪大矣神  
不汝殺亦云幸也且峽既介潔清悶如此乃陸海之三  
神山也是宜閭苑真仙指以為離宮別館誕降爾衆之  
厚福故凡往來者既濟矣當于此致謝未濟矣當于此

致禱以無忘神之德云紹興十有七年二月永卿赴  
官期道出祠下既以祇謁若有神物以鬱發僕之夙心  
者因備述之以大闡揚神之威命明辟且為迎饗送神  
之詩用相祀事繫之碑末曰

夔子之國山曰巫

考驗異事聞古初

有龍十二騰大虛

仙官適見嚴訶吁

霹靂一聲龍下徂

化為竒峰相與俱

至今逸氣不盡除

天矯尚欲升天衢



壯哉絕境天下無  
宜為仙聖之攸居

仰惟高真握珍符  
鎮治名山奠坤輿

昔禹治水何勤劬  
按行粵至萬鬼區

妖怪護惜紛恣睢  
風沙晝晦迷道途

神人親御八景輿  
授禹丹篆之靈書

文命稽首受寶圖  
手握造化幽明樞

驅役鬼神纔斯須  
萬靈恐懼聽指呼

巨鑿振響轟雷車  
回祿烈火山骨殂

墾闢頑狼如泥塗

岷江東去無停瀦

倘非神人協禹謨

襄陵正怒民其魚

大功造成反清都

朝遊閨苑暮蓬壺

呼吸日月飲雲腴

瀕視濁世嗟卑洿

江臯古廟象儲胥

神兮幸此留跼蹶

自古膏澤常霑濡

逮今疲瘵蒙昭蘇

巴峽對人貌瘠臞

願降豐歲朝夕舖

出入樵採無於菟

客舟性命寄須臾

願賜神庥保厥軀

往來上下無憂虞

日則居兮月則諸

繫嚴奉兮永不渝

丞相平襄侯廟記

徐閣中

紹興二十三年徐閣中記云

缺十  
五字

邦家恢復海宇混三

分

缺二十  
五字

恤險阻

缺九  
字

宸飈電迅遂奏愷廟拓勒勲鐘

鼎

缺十  
九字

丞相平襄侯姜公其人也諸葛孔明嘗謂公忠

勤時事思慮精審

缺十  
九字

以胡塞之要鄧伯苗賦性剛簡

宜尤重許可者獨知公而深器異至若

缺十  
八字

賴風度雋

偉何啻百夫之特實迺萬夫之望是宜整嚴猘狽深入

敵境

缺十  
八字

歸進圍襄武徐質交陣而潰拔河間狄道師

洮三邑殄刺史

缺二十  
二字

其髣髴哉然勝負兵家之常自

古用兵曷能常勝就其不

缺二十  
二字

會上邽貴聲援相接

也濟爽約不前宜有段谷之敗聞鍾會

缺三  
字

進表

缺十  
七字

之策緩不及事宜為文所摧厥後會擁大軍長驅而入

缺四  
字

列營

缺十  
七字

壓境遂破諸葛瞻于綿竹後主趨降其

降也譙周反復曲折之謀也于時廷臣

缺十  
六字

保家從其

謀而甘心焉獨北地王謀忠諫莫伸痛憤自盡訖死無

補向使公

七字

十謀迺身先駢銳乘城確守坐困勅敵危

國復活一反掌間不足以言容貴

七字

十莫能破轉輸邈

絕屢擬班師使艾直薄城二將勢分又非所利漢于此

少知

八字

十人涉險會以二萬衆留劍閣二主僮數日不

降三軍阻飢二將難以反矣

八字

十公語楊儀反旗鳴鼓

若將攻敵者仲達退不敢逼于是儀得結陣而

九字

十容

髮非公勝筭明敏出奇神速詎能弭患于倉卒耶抑嘗

謂人有云

缺十  
九字

飾取供輿馬取具室無姬媵庭無聲樂

財無儲蓄食不過制常以清

缺十  
九字

者如彼故其有為者

如此及會叛魏附公公乃陰圖克復勢誠無

缺二  
十字

蘆山

圖經縣城公所築也俗號姜城遺址尚存環皆出峭

缺一

字錯

缺二  
十字

為國長慮殆非小補令邑戶六千夷漢混居

民風淳質力穡敦本

缺二  
十字

明時樂國也萬世固圉之利

公之盛德遠矣哉土人懷公

缺二十  
一字

威靈不泯莫不畏

而仰之闕中參究載籍

缺二  
字

昭烈帝帝系出

缺二  
十字

昭烈

即位武擔為漢中王志在紹高光四百年之基理宜稱

漢

十缺二字

壽蜀人且嘗事蜀意憚魏晉君子薄之皇朝司

馬溫公資治通鑑即稱漢以表其實復讀當時楊戲所

十缺

丞相平襄侯揭之又叙公事漢始末刻之堅珉屬

以詠意或歌

缺一十字

奕奕姜姓系宗四嶽尚父興周神謀超卓韜略

缺一十字

危探虎窟身不暇顧黠羌驕侮談笑蕩平連捷

缺一十字

籌非不精愛莫助之謂公黷武曾不爾思營捷抗

缺一九

字允南醇儒識闇事機一唱朋從騰書納璽譙周

十缺

字成功信天非人能勝運儻荐興公儔冠鄧純誠終

始

字缺八

民心載舒神休是憑瑣才臨政荷神孚祐爰

紀豐功

此碑泐壞已不可讀其文字可見者僅如此愚恐其愈久將併今可見者而失之因錄于

左

重修先主廟記

任淵

智力之不勝義也久矣昔自英雄豪傑乘時崛起有能仗義而行偉然正大指麾號令天下從之雖其不幸不



克大有所成就于當時而風烈之餘猶足以聳動後世  
歷千百載尊仰而懷思之有不能自己者非以義勝故  
與東漢之季王室陵夷曹氏怙姦賊之資以擅中原孫  
氏席强大之勢以并江左皆矜尚智力求所非望非有  
志于王室也海內之士劫于威制雖俛首聽從而心不  
與之至後世利害不相及則排貶譏笑未始少容惟蜀  
先主昭烈帝以宗胄之英負非常之志崎嶇奔走經理  
四方最後伐劉璋遂有蜀漢蓋將憑藉高祖興王之地

建立本基然後列兵東向誅有罪而吊遺民以紹復漢家大業其理順其辭直非若孫曹氏之自為謀也當是時丞相忠武諸葛侯實左右之人品意象高遠英特駁駁乎伊呂之間應變機權本于道德內脩綜核之政外舉節制之師欲以攘除奸凶混一區宇不負其君付託之意可謂社稷臣矣彼其君臣仗義而行正大如此是以海內之士推與而誠服之舉無異論雖厄于運數屈其遠圖而後世有讀其遺書過其陵廟者未嘗不咨嗟

流涕尊仰而懷思之也夫義之所在俯仰無愧天地且將直之見信于人亦其理之然哉成都之南三里所丘阜巋然曰惠陵者實昭烈弓劍所藏之地有廟在其東所從來遠矣大殿南向昭烈弁冕臨之東夾室以祔後主而西偏少南又有別廟忠武侯在焉老柏參天氣象甚古詩人嘗為賦之廟久不治風雨摧剝殿廡門牆率皆頽圯破缺像設僅存至或露處紹興二十有八年秋九月蜀當謀帥上親擇廷臣文武兼資可屬方面者得

中書舍人王公命以龍圖閣待制制置四川使出鎮成都臨遣甚寵粵明年夏四月公始至用故事謁諸祠奠獻至此顧瞻太息曰有大功德于蜀人宜莫若昭烈忠武廟貌乃爾亦獨何心亟命有司繕治之鳩工庀材咸有程度以是歲十月己巳經始落成于明年三月己丑雖號為因舊起費實再造而一新之棟宇宏敞丹雘鮮明堅壯精密足以經久祠與惠陵皆護以垣墉限禁樵牧築室忠武祠北明潔幽邃有事于神者得以休焉蓋

舊所基也用工萬一千六百七十有八為錢無慮二百萬木章竹箇取于數百步商旅之征勞與費民不知焉既成命淵記之淵懼陋不克稱固辭公不許乃冒昧書其事蓋嘗妄論王霸之說以謂義近王智力近霸竊觀昭烈忠武之所為非深于王道未易明其心于千載上也今公之所學宏遠高明而尤卓然一以宗王為本嘗過公孫述廟笑唾不顧至劉蜀君臣嚴事之如此意固有在非特以欽崇秩祀為牧守之所當先也鎮蜀未幾

威德流聞民夷寧謚視忠武不愧異時志得道行其助  
恢漢業興三代之禮樂不難矣公名剛中都陽人開豁  
邁往而克勤庶事綜練周密治蜀之政百廢具舉不獨  
新此廟之可書也紹興三十年記

張飛廟記

安剛中

漢自建安以來皇綱齊弛神鼎震覆姦雄觀釁實生豕  
心本初孟德之徒磨牙厲吻血視生靈期于吞噬不顧  
遺臭玄德忼慨為國志在援拯一時豪傑徇義蜂起相

與提挈共成大事諸葛關張實為之最凜冽威風萬夫  
之雄荊州之役群盜突來公為後拒畢力盡死以抗羣  
醜奮髯張目橫戈一叱蛇豕異類褫魄逃遯虞淵之日  
復耀西南繫公之功迄今千載英靈之氣森聳如在廟  
食百世在禮固宜樂溫之山下瞰大江公之神爽實是  
寓焉自古迄今長載祀典舟行上下與茲士民奔走奉  
事敢不虔至九穀嘉生連被原隰舸楫往返安流無恙  
陰相之功在國與民天朝累封進爵為王惟是廟宇興

建歲久行廊爛頽往來咨嗟力莫能振郡守李公向者趨朝祇謁祠下再拜祈禱厥應如響至郡未幾首議修繕自捐金帛衆趨成之功費雖多了不病民徹去卑陋增飾輪奐開展地基比舊加倍是役也議興于庚午之冬落成于辛未之春惟公既有以利其民矣又有以奉其神民和神安福祿來宜行將以是賀公剛中忝吏是役知之為詳敢具以記

白帝廟辯誣記

張琬



漢室不競王莽擅朝夤緣肺腑遂盜弄神器天人之所  
不與凡一世之豪傑有志天下者皆得起而誅之公孫  
帝蓋欲誅莽之一人也於漢何罪而近年有蒙帝以僭叛  
之名者過車不式祠禮不講邦人奔走禘嘗事既踰千  
載矣聞而醜之玃敬為將書表正其事謹按更始二年  
公孫帝自立為蜀王明年夏四月稱帝改元龍興是歲漢  
世祖以蕭王即位鄣南改元建武是為光武皇帝方豪  
傑羣起時孰不欲八紘身都萬乘而廢興有命神器

非人力可爭要始終公孫帝初不得罪于漢而盡有益  
州之地子養一方者十有三年于蜀不得為無功臨陣  
隕命與其國俱為存亡以誓死不降一念能血食千祀  
視古神名無所多讓然則其志可謂賢矣光武嘗賜公  
孫皇帝書且曰君非吾賊臣亂子則蒙帝以僭亂之名  
者其失于考按甚矣玃敬以漢法隸大書其榜曰公孫  
皇帝之祠且敬叙其本末如右方刻之廟中以一洗其  
誣帝英爽如在尚其臨鑒此言帝諱述字子陽號成家

世呼為白帝廟云乾道七年中秋日晉人張琬書

孝感廟記

鄭少微

按今漢州德陽縣西北四十里有鎮東漢姜詩故宅在焉故號姜詩里治平中知綿竹縣事郭震者謂詩行甚高宜諱其名白部刺史易之鎮遂號孝泉然廟猶因俗為呼于是開州司理叅軍白壽朋與鄉之士民列于縣曰姜詩夫婦事跡最詳于漢史所謂舍側湧泉至今不絕民賴灌溉或遇旱厲禱焉輒應其厚俗利人之功居

多廟額獨未蒙賜敢請縣乃上之有旨賜名孝感命至之日稚耄夾塗載舞踴躍爭觀為人子若夫者咸欲詩之行在其身也為人女若婦者咸欲龐氏之行在其身也為人父母若舅姑者咸願有子如詩有女有婦如龐氏也則又相與詫于他州之民曰吾鄉雖僻幽而姜詩夫婦乃吾東家子也爾州曾有是耶方且侈上之賜以求稱厥名而故祠庠狹面勢不正像設不嚴靈不安安瞻祈無所于是通直郎致事張績以義倡焉相其方位

而辨奠之凡為屋五十楹益浚其泉流擇旁寺僧之潔  
勤者益之弘奠肅密千載陳迹一朝如新甚盛觀也廟  
成七年而紀述尚缺通直公子承議郎上行委少微書  
焉謂變風之際距先王未久婦人女子苟有片善可稱  
者遂見美于詩見取于孔子如共姜許穆夫人衛女皆  
貴者之妻不過以禮義自待不嫁不歸而已其植節挺  
操之難感格神明之異實後世賤夫匹婦未肯遠避之  
也范曄後漢書列女傳十有七而出于蜀者至四人一

出南鄭一出廣漢二出健為如程文矩妻于其子直以  
人情為之耳盛德妻于其夫叔先雄于其父殺身成仁  
固美矣要之不得已而然者若龐氏者事尤較著蓋未  
始行乎危難惟雍容禮法之中遂能感無知之魚草難  
化之盜使貴而姬姜賤而妾媵皆可黽勉以庶幾萬一  
讀漢書者未有不聳然而嘆而况臨其魚躍之淵與盜  
過之里也哉然則龐氏之遇亦不為不幸也通直公有  
二子上行中行相繼登第事親孝謹清議許其賢餘皆

有諸昆之風年今七十餘銀章朱紱偕其夫人板輿往  
來二子間鄉人榮之推其所自蓋發潛扶教之影響云

南康郡王廟記

張縝

郡邑通祀有功德于民者蓋古制也秦時蜀守冰鑿離  
堆辟沫水之害溉田以倍萬計相與尸而祝之者今環  
蜀境漢興守文翁飭厲諸生于學蜀地學京師者比齊  
魯其後學校官為石室以祀翁至欲周公孔子配秦守  
以功惠漢守以德教光明俊偉世傳誦之自是以來凡

守之賢者蜀人必以建祠或繪其像天下名鎮未是有也其去蜀遠而地勝受蜀之寄必其要領大人所可倚重者丞相御史徃徃不盡拘以文法政令能專膏澤可下而蜀之人亦以所事于君師者事之安其令而不違故雖去而敬其奉嘗猶不敢忘然則蜀視天下其亦可謂敦厚而易至矣唐制用節度使治蜀前後名人相望韋南康郡王在治最久德惠最著今蜀人之祠王者秩于土神家有其像而府城內外獨無專祠于禮為不稱



今龍圖閣直學士四川制置使內相胡公鎮蜀之明年  
惟蜀諸路鹽之額浮茶之賦重與夫夔峽科買金銀之  
弊垂六十年民力重斂吏陰拱熟視莫一措手公悉審  
核精考以聞凡所以為民之瘼者不一而足公討理脉  
絡剝求根株盡變乃止初青羌奴結之未就順也公時  
方入境增調西兵指授方略扼其首尾制不得肆至是  
懾服面縛塞下環蜀地數萬里安于靜簡雨暘順序年  
穀屢豐衆政既舉迺講舊典之缺度故宮宇之隙地新

庀王祠門屋耽耽廣殿渠渠修廊環擁便坐後列經始  
于二月之庚子告成于十二月之庚戌土木陶甃圻墁  
之工凡九千六百五十四費一出于官而民不與知蜀  
人戴公之德猶昔之德王也王祠既建民益忭舞續以  
部中守吏入受約束于公府下公命續記其事辭不獲  
請續乃復考王之終始而復于公曰王治蜀二十一年  
當貞元姑息猜忌之間外能折吐蕃之鷓張以功自結  
于朝中能撫柔其民二歲一復使蜀土晏然皆樂其生

王之德于蜀蓋如此然王之始進也以隴州假守斬朱  
泚之使至其末也露章斥王叔文之姦建請憲臣監國  
朝廷為之增氣大節凜凜皎若日月豈獨書治蜀之功  
哉且今之蜀猶昔之蜀也王用蜀兵破吐蕃四十八萬  
衆俘其驍酋靡不如志雖諸葛孔明南定之功無以尚  
之而往者數歲間黎雅小夷陸梁山谷吾將士乃巽懦  
不武久無尺寸功今始聞其稽顙屈服然則王之折衝  
英略著于簡策之舊者其可不崇大之以昭示來葉公

方將奮張王靈洒掃宇縣以成陛下復古之烈宜于王  
眷然興懷而不置也語未既衆皆起曰子之言然盍遂  
書之續以其事敬書于石王諱臯字城武唐史有傳淳  
熙五年十一月壬申記

縻棗堰劉公祠堂記

何涉

益居三蜀中地廣衍疏衆流以沃民田以塹都邑由是  
得川名故時汶江跳波刮午門南東注治有子城而無  
郭郭唐丞相高公駢之作牧也懲蠻詔張叻擇腴而噬

且謂走集宜險因度高城其外周數十里開包索以容  
居民築堤鄣江號縻棗堰折湍勢滙于新城北以休養  
生聚護此土不然句五代邁屯靡皇西略兩僭相繼弗  
恤弗備皇朝乾德四載秋七月西山積霖江水騰漲拂  
鬱暴怒潰堰感西閭樓址以入排故道漫漭兩壩汹汹  
趨下墊廬舍廬閉浩乎若尾閭橫決傍無涯濬思次之  
旌與交易之質劑離懸渾沄雜百物資儲蔽波而逝獨  
用畫故民得不為魚開寶改號之初天子輟端明殿學

士尚書兵部侍郎劉公熙古帥州始大修是堰約去訖  
民害招置防河健卒列營便地伺壞隙輒補以故連絕  
水虞比屋蒙仁多繪像而拜思之與平崖等自時厥後  
綿祀八十功忽而歲經事久而日遺言言巨防股難墮  
毀升高遐望江之端頰城大齧如餒鷲鳥恬而勿圖可  
為駭歎慶厯己酉朝議曩霄歸嘆西邊粗定回顧井絡  
宜得良帥遂自隴右加今知府文公樞直改轅而來俾  
厥飢羸使安業乳哺公力勤才敏不以高簡自飾視劇

穴若庖丁解牛匠石運斤幽陰阮蹊燭露夷易巨細疏密  
莫不曲到一日嘗從僚吏詣所謂縻棗堰者左右臨顧  
推本利害而曰非中山公成都其豬乎昔者勤勞謂何後  
者解弛謂何將利近易知害遠難究哉以吾為尹于茲  
誠不可遺西人他日戒懼由是大營工健益庫附薄為  
數十百年計盤據廣袤罔分隲屬湯湯洪波演漾徐  
轉堰脊舊有神宇榜曰龍堂俚而且誣義不足訓公以  
為思人愛樹國風所由著美今中山之德入人深如是

而廟貌弗建實前所闕因易新制厥劉公祠堂其上為里崇水旱報豐穰之所矧自經始公發之既作公巡之已成公落之可謂惠訓不倦功施于民君子矣越踰月涉承檄至府下公具道首尾仍命縷其事將金石刻涉按祭法能禦大菑則祀若劉公者築堰以除民害其禦大菑者與春秋常事不書非常書公增修茲為無窮利其非常者與衆皆曰然遂列言以獻慶曆六年記

縻棗堰記

楊甲



上之淳熙二年吳郡范公以鈇鉞鎮蜀仁行如春威行  
如秋休養生息人用以寧越明年六月築亭于縻棗堰  
下雲汀烟渚競秀于前古木脩篁左右環峙相蔭森森  
亘數十里幽曠清遠真益州之勝槩也又親書扁榜揭  
之顏間道勁絕塵得古人用筆意藻繪不加而勝益竒  
矣又四年四月公始與客集于亭上命其諸生楊甲  
為之記甲詣轅門上謁以辭不獲退伏念蜀土肥行  
由引江溉焉有如波流湍悍則鬻渚厓穡事昏墊民且

不奠居縻棗堰者殺湍悍之巨防也夷考厥初雖肇于唐高駢然陴陋易圯不足以陞洪源折逆流逮隆崇基以灑沈澹災引注灌溉膏我梁稻而無汜濫決溢者宋端明殿學士劉公熙古之力也自開寶以迄于今踰二百年而沃野之利溥矣享其利而忘其功不可也斯亭之作無乃章劉公之懿而起蜀人無窮之意乎蓋公之政以惠利斯民為急方其弭節奏減蜀之酒課四十八萬緡罷糴關中亦七十六萬斛公所為若是故視有功

于民者欣然之色發越眉宇其惓惓于劉宜也甲承命書之使後之登覽者不獨有微禹之歎而敬公章善予能之意焉公名成大號石湖居士道德文章震撼九牧嘗使絕域有功矣集于亭之月上詔來錫公命加敷文閣直學士召赴行在所其治蜀之績可知也

忠節廟記

李駒

曾子居武城寇至則去寇退則反子思居衛則曰如伋去君誰與守二子所為不同而孟子以為曾子子思同

道豈非曾子之所去子思之所守者耶余觀夏公之死  
誠有得于子思之守也方王室之亂朝廷紀綱蕩然藩  
臣跋扈而長蛇封豕強者輒勝天下之人奪氣喪胆卒  
無豪傑之士慨然特立不待文王而後興者公于此時  
乃能嬰孤城提弱卒與孟知祥董璋爭一日之勝而奮  
不顧身死之為當時所難而公能行之何者方董孟二  
蜀連橫拒命負固猖獗攻克遂闔稱兵之初衆號十萬  
旌旗延亘直薄武信公自忠武召還繼鎮此土適蜀兵

次明月池而公以騎卒二千勢不相軋乃堅壁深池坐  
困強敵始自戊寅迄于己巳蜀兵以洞室穴城自夕達  
旦公亦以驍勁力守曾不少衄不幸食盡勢窮義不苟  
生背裂血面竟以死謝方是之時邛雅資眉黎茂刺史  
請命于蜀不啻奴隸而康文通輩亦束手趨成都且語  
知祥以夏公以死自守必無降意則公大節固已有素  
非偶然者然而世之議者乃列公為死事而不得與死  
節者比此尤可歎方王彥章之守中都竟為夏公所擒

而死裴約之見殺劉仁贍之病卒皆未有卓然竒節不為敵人所屈如夏公者死節死事何自而分豈不以夏公去梁奔晉為公之疵而不知公之去就亦自有見觀公之戰單廷珪元行欽決莊宗之圍挫王彥章之勇河陽之惠政武信之遺烈至于設庠序以闡文教營雉堞以講武事深沈幾略靜以制勝意其忠義自將非若庸人武夫死于無名者昔者張巡之守睢陽勢窮備竭竟詬賊而終使夏公不幸有如張巡彼肯搖尾乞憐為齷

齷苟全者耶苟援兵繼來孤壘堅守可以振揚北師鞭撻堅寇二虜之首坐致麾下將見公之功名自此輝赫非特一死而已以其所已為觀其所未為則公之大槩不論可知今夫世之人臨小利害僅若毫髮至有俯仰詞色以為去就况公之守土效死勿去與子思之居衛節守無異而議者乃以死事名之果信然與駙被命出守是邦恭謁祠下痛公之大節既不為秉筆者所知而百載之後復未有顯號以揚公之美請之于朝蒙賜旌

忠廟號舊惟郡圃祠堂卑隘湫陋不足以仰副朝廷追顯之意遂議更置度地于東城之隅凡板幹柱礎瓴壁瓦垣墉不取諸民而悉出給于官曾未閱時而殿宇凜然亦以大公之威而竦邦人之視因備述公守土始末且敷揚朝廷所以賜號之意刻之堅珉庶幾可以為公無窮之榮而攄百載湮沒之憤使邦人每過祠下輒曰此夏公之祠也忠義之事吾曹可不勉乎夏公名魯奇字邦傑其始終出處詳之史冊此不復書



文翁祠堂記

宋祁

蜀之廟食千五百年不絕者秦李公冰漢文公翁兩祠而已冰為蜀鑿離堆逐悍水以溉民田溉所常及無旱年西人德之因言冰身與水怪鬪不勝死自是江無暴流蛟蜃怖藏人恬以生故侈大房殿歲擊羊豕雉魚伐鼓笑籥傾數十州之人人得侍祠奔走鼓舞以娛悅神祝已傳遐而後敢安公之治蜀開學校以詩書教人澡刷故俗長長少少尊尊親親百姓順賴其後司馬相如

王褒揚雄以文章倡張寬以博聞顯莊遵李仲元以有道稱何武入為三公漢家號令典章赫然與三代等蜀有儒自翁始班固言之既詳矣初公為禮殿以舍孔子及七十二子之像殿右廡作石室舍公像于中晚漢學焚有守曰高朕能興完之後人又作朕像進偶公室歲時長吏率掾屬諸生奉籩豆饗醪薦于前虔踧謹潔一再奠而退辭無不敬信焉冰以功翁以德功易見德難知故祠雖偕而優狹異焉嘉祐二年予知益州往款公

祠至則區位湫溷埃蝕垢蒙不稱所聞大懼禮益懈  
忽神弗臨享其明年乃占學宮之西攻位鳩工弗亟弗  
遲作堂三楹張左右序及獻廡大抵若干間布尋以度  
堂累常以度庭䟽窻以快顯壯闔以嚴閉采有青丹陛  
級夷瓦密棟強若棘若飛乃肖公像于宇間繪相如等  
于東西壁本古學之復莫若朕本今學之盛莫若古樞  
密直學士蔣公堂故繪二公于宦漏皆配祠焉于是擇  
日告成于神揖而升簞罍果酒脯脩紛羅而有容可以

造虔趨而降壘，鑄中尊庭燎，並施而不恩，可以盡儀相者，循循任者，舒舒禮生，于嚴廣靈，安于間寂，故也。噫！自公以來，蜀之人自視若鄒魯，宋興名臣，巨公踵相逮于朝。先帝時，巨盜再作，亂弄庫兵，爭劍閣。是時，蜀豪英無一汙賊者，群頑愁窘，不容喙而滅。非人知忠家知孝，使然耶？所使然者，不自公與。傳曰：非此族也不在祀典。公在之矣，則是祠之作，願自余而古無俾外。息云：祠之興同尚之賢，則轉運使趙抃及提點刑獄使者凡三人。

賢輔之勤自通判軍州事祝詔以降六人營董之勞自  
兵馬都監毛永保而下二人咸畫像于西廂列官里于  
石陰銘曰

公二千石兮守大邦冠戔戔兮紱斯皇出有瑞節兮  
車騎羅石室孔卑兮人謂何新堂翼翼兮耿耿庭廣  
直兮序巖巖更奉神兮不諱神來此徙兮此其家儼  
羣賢兮並陳公所教兮如其仁庖魚挺兮俎肉鮮神  
來享兮愴宛延公教在人兮無有頗蜀賢不乏兮才

日多俗祥順兮孝慈公祀百世兮庸可知治平四年  
記

學射山仙祠記

文同

龍圖閣直學士趙公抃治平二年夏四月被詔守蜀明年春以上已來遊學射山同民樂也故事有張栢子者嘗居此學道以是日成得上帝詔駕赤文於菟爾雲衢翀天闕以去爾後凡其時兩蜀之人如以戒令約不赴而有所誅責者奔走會其上詣通真觀禱其神從道士

受秘籙以歸一年禍福率指此曰情與恭之所招致也  
自昔語如此人益起信逮今遠近以期而至者愈無缺  
數成都燕集用一春為常三日不脩已云遠甚然各有  
定處惟此山之會最極盛矣太守與其屬候城以出鐘  
鼓旗旆綿二十里無少缺都人士女被珠貝服繒錦藻  
績巖麗映照原野浩如翻江華如凝霞上下立列窮極  
繁麗倘佯徙倚直暮而入公既至嘉遊人之遽然復愛  
其地距城不一舍而孤嶺橫出夷陸景氣殊曠絕但謂

宮室獨與物不比稱明日召知縣事李君弼賢語之曰  
此隸治下載譜籍實號勝處而摹矩制量諸不如所說  
奈何議者不咎將屬之于守宰與予與君其欲對人不  
愧中在謀其完矣遂授之宜所以當然者君曰諾公所  
命弼賢能為之乃調匠度材悉以良法不煩公不傷私  
未逾時而已云事事矣為三清殿為張先生祠堂為道  
宮齋館為燕宇便室與凡所以可為之屋者一一無不  
有亡慮三十楹開台延連輝顯華眈兀于雲際動于林



表誠棲真秘履而合宴之佳觀也自是日有來者嗟頌  
顧矚聚吻而談曰此地不知化為榛墟者凡幾年一日  
為賢者所經慮芟舊而揭新之詎偶然耶豈神靈所  
居不可廢待其人而後俾興之耶不然何歷歲滋久而  
無一有所問者耶盍延其傳以附于地志宜矣公因使  
文同之為紀其楠四年記

郫縣漢大司空何公祠堂記

侯溥

君子治亦仁亂亦仁治亂殊時而君子之仁一也孔子

曰殷有三仁焉其以異于迹而同于心乎微子之去無以異乎箕子之留而囚辱也箕子之囚辱無以異乎比干之諫而剖剔也先王廟貌去則祀否則絕微子不敢留先王大法生則傳否則亡箕子不敢死先王忠義死則得否則喪比干不敢生各有當然耳漢德中缺而大盜作方作之時蜀郡有三仁焉生焉而仁其惟揚子雲乎死焉而仁其惟何君公乎子雲于漢為給事黃門三世不徙官其受祿也輕其任事也微一日遭新莽之變

而責子雲以死國是不知道者也詩曰既明且哲以保其身其子雲之謂乎君公起諸生而位三公爵通侯主在與在主亡與亡固其職矣姦慝構誣卒以捐生詩云之死矢靡它之死矢靡慝其君公之謂乎子雲不死而太玄法言垂之萬世猶箕子之有洪範也君公不生而高名大節千古凜凜猶比干之諫而死也使子雲有君公之位而君公居子雲之地則亦彼死而此生矣生者以文傳而死者以忠傳文可日見忠隨世異是以子雲

之詞盛于蜀而君公獨未聞焉君公葬于郫綿東漢閱  
劉蜀歷二晉以至于唐至于五代至于今蓋亦久矣宅  
兆四周化為畦塍貧夫力耕殆至穿夷所賴以知者特  
二石柱爾知府大資政趙公聞之惻然曰君公之忠可  
以磨激萬祀今也食不得以血于廟基不得以鬣于田  
殆非所以揚厲名教乃籲有司移告于郫俾治厥封俾  
建厥祠于是著作佐郎趙濬以縣令實職其事先是嘉  
祐中邑儒何昌禹嘗憤居民耨此墓之四周而末如之

何因其賣之也而市之至是其姪邁獻其地三百步有  
進士某某倡邑之學者復市二百步以獻昔墓且毀今  
築以修昔廟未建今宇以祠乃礮石柱鏡識年月乃植  
嘉木表立畦畛事既集大資政命溥為之記溥伏觀古  
之君子立身行已太上立天下之所不能立行天下之  
所不能行其次立而所難立行而所難行其次立所當  
立而行所當行如君公者蓋竊以為得其上焉者矣封  
其墓建其祠其誰曰不然熙寧六年記

范文正公祠堂記

家安國

公嘗曰周漢之興天下為福為壽數百年當時致君者  
功可知矣周漢之衰天下為血為肉數百年當時致君  
者罪可知矣考公之時朝廷致君之人喜功畏罪者尤  
多惟公之望節若南山貴名之起揭如日月亘諸夏之  
廣盡九夷之陋凡有古者皆恥不談希文何耶好善優  
于天下而已矣善人天地之紀也政教之本也其所以  
優于天下者能思天下之所不思能為天下之所不為

先天下之憂而憂後天下之樂而樂也然知為可憂則先王之澤無不備于世矣知為可樂則一夫之生無不獲其所矣公之憂如是而竟無以解其憂公之樂如是而竟不得享其樂豈成功則天與公疏上壽儀以正君道諫楊太妃不可稱制以立母儀述張華事西晉以諷宰相此天下所不能思也公叅大政首請天下興學取士先德行不專文詞減任子以除冗官此天下所不能為也上百官圖以任人材舉縣令擇郡守以固邦本保直臣

斥佞人以明國聽復游散去冗僭以厚民力此天下之  
憂而公先之也西民禍兵公以龍圖閣直學士帥延慶  
橫山靈武勢如腐槁朝廷乃以邠州管内觀察使授公  
公曰漢御史出案二千石唐御史節度使以軍禮見本  
朝學士丞郎出臨戎閫節度諸將望風稟律皆由朝廷  
之重也居內朝近侍之職有彌縫闕失之道若貪厚祿  
換此外帥體當承迎朝廷指蹤無復議論廟筭得失矣  
况西華之地知有龍圖老子不知有太尉也竟辭元昊



以書窺伺朝廷公惡其僭號斥不為奏自答其說諭以  
逆順禍福之理元昊卒服公言稱臣請和此國強民息  
天下知其樂也然則所謂優于天下者數十百年以來  
非公而能之乎夫人臣之善莫大於興禮樂世有不得  
其門而入雖房杜之美其如不能何庠序者禮樂之門  
也得其門知其文矣知其文達其情矣情文備則致君  
挈國之功言不下帶而禮化行如神矣吾宋聖治迨慶  
歷僅百年太平之效以文致實景德祥符之風不減三

代而功成治定未暇制作天下之人望禮樂之門不得而入公闢其門使天下由之雍泮之水洗天下之心後進之君子先進之野人參軌結轍可以論述制作者與時輩出然考積德之年天實有所興也成都學宮西南觀教之地二漢以降非善人之迹不存近世宏堂列像迨逾百人皆所遵德景行熙寧初公仲子丞相純仁漕蜀西南之人始請公像圖之經史閣西廡諸生歲時謁拜于前以筵祀未稱愧甚久元祐戊辰寶文閣直學士

李公尹蜀誠于應物樂于為善凡可以成法者皆欲舉  
之客有告曰蜀有學自文翁始本朝郡邑有學自范文  
正公始天下之為烈者先王之所不遺法施于民者世  
主之所必報不遺之所以顯仁必報之所以立義事有  
惻然之仁孑然之義下及于蟲魚草木雖曠代異古且  
猶不忘况赫然耳目之前明德輔世及于士民乎願正  
公祠使天下為善者勸李公樂其請命工成之于禮殿  
之東與石室對峙焉客喜而歌曰

岷山之靈會公之英千歲之聲非雷非霆道德之澤  
以保我後生明哲之誠禮義之經百世之廟昭乎日  
星教化之功地平而天成

張忠定公祠堂記

楊天惠

故贈尚書左僕射濮陽張公為政于蜀久矣然蜀人奉  
事如新行臺畏愛如隔信宿蓋由今崇寧之乙丑距前  
淳化之甲午逆數甲子已一百一十有三年維是城闕  
之衣冠與市區之翁媪凡幾換易雖其當時駕竹小兒

常及公行奉折轅車者亦已繫滅飄為煨塵至于晚年  
一二遺子弱孫亦復衰落跂跂向盡然後生孺子歲時  
念公乃如公初辦嚴欲離軍府時事至比其大父與高  
曾行禮意勤渠反更過之此非人情榮古上鬼喜以所  
聞為勝不覲為神抑亦公之盛德有所膠固令人不可  
懈于心故自公在事吏民固已竊圖容表共祠于家飲  
食必祝蘄無弃我然而比公去治歷年引久乃未有築  
宇俎豆之者及樞密直學士公始為廟室附祀典如典

禮而龍圖閣學士劉公又從而潔完之它事益光已而  
星霜流易木石老憊月支歲柱危就傾仆于是今大尹  
前戶部尚書虞公過而怪焉曰公蜀召與也奈何乎忘  
之言未既有號于衆者曰信也後之矣宜乎公以我為  
忘也我則非夫其又奚言旦日則相與頓首伏府門下  
因鈴史具言所以慙負狀願假期日自効虞公遣吏勞  
苦罷之亟下令華陽如其請且以知縣事李君孟俠董  
匠事凡為屋七十楹度堂十几竭作十旬百堵用成寢

宮闕清牆戶鮮整氣色明喜靈觀忽還又以虞公之德  
為與公合也輒繪生祠而置堂中央并取同時部使者  
一二大人像離列其次于是東蜀楊某聞而竊喜曰甚  
矣蜀人之愛張公也其好語故事者徃徃旁掇茫昧為  
神異之傳學士大夫多疑之故弗論特論公始所以平  
治亂紛終所以化美風俗大抵氣決嚴重如汲黯而不  
強塞拊循安利如倪寬而不需懦操制英發如趙廣漢  
而不輕急治體綿密如召信臣而不寒儉故內脩刑政

外靖羌夷皆有度程不失尺寸至米鹽估直燕游在所  
不講若紀律不可輒易昔黃霸居潁川蓋八年功乃成  
公鎮西南凡七歲治益顯然霸微緣飾為奇怪辭畔異  
路鳳凰神爵疑與上計之奏鷓鴣之謬無以異乃公所  
為則無有是獨就法理為久遠膏澤所沛慊足後人鳴  
呼所謂盛德必有世祀非公之謂耶故論之以告遺民  
且為迎神詩曲授巫覡俾歌舞焉而并刻之詩曰

若有人兮濮上告外趣駕兮焉往朝嵩洛兮蓐食晡



咸柰兮共張蹇颯飛兮電掣即參井兮一方坐劔扉  
兮俄蓋呵力丁兮扶轍倚鹿頭兮徬徨顧其下兮餘  
鄉水油油兮雲委天與地沓兮耕桑靈之集兮安止  
休後乘兮山趾父老羅拜兮勤歸問何濶兮音旨步  
空谷兮新宮仰桂楣兮叢叢睇垣廡兮四繚紛采飾  
兮青紅靈顏愉兮康樂御圓方兮綺錯進巴歌兮  
歛舞神已汰兮不惡西玉壘兮微冥臨岷水兮不驚  
南靈關兮窈眇與雪山兮為局靈之懽兮澹蕩更千

秋兮一餉決祥液兮天門浸吾人兮決潏謂君公兮  
良勞起我歷兮崇朝公行歸兮俯視此赤白兮中霄

張忠定公祠堂記

王剛中

謹按禮經曰有功德于民則祀之又曰盛德至善民之  
不能忘信哉是言也藝祖受命四方僭叛以次削平乾  
德中一舉下蜀首命叅政呂公餘慶知成都越三十餘  
年再至率成考績其為治大抵以嚴猛奮厲制其暴以  
精明果斷摘其姦以公平信義善其俗訟至于庭據案

一決恚中其隱百姓驚歎以為神明而不敢犯及受代而去密令寫真封以授僧希白戒之曰後十年即可開及期視之公適化去而訃至矣于是蜀人慟哭罷市置公畫像于天慶觀之仙遊閣建大齋會事之如生歲歲不絕迄嘉祐己亥府帥侍讀王公素始大建祠于府治之東落成之日人無幼艾爭捧牢酒或喜或泣列拜于庭雖周人之思召公襄人之思羊叔子無以加焉既又取公治蜀斷語可為後世法凡百三十首圖于壁嗚呼

公之治可謂有功德于蜀人而蜀人懷公德善亦可謂  
不忘者矣剛中猥以庸陋被命帥蜀兼治成都距公又  
百六十餘年遐想風績卓乎莫及嘗躬奠祠下徘徊周  
覽惜其歷歲滋多堂宇且弊乃命即其椽椽梁柱之撓  
弱而不支者瓴甃堦礎之缺斷而不承者高甍隆棟風  
雨之所飄剝者長廊巨壁丹青之已漫滅者悉舉而更  
新之仍于祠後增接兩廊建堂三間築垣墉以周之而  
稍植花木于堂北以為士大夫謁祠遊息之所且以稱

邦人嚴奉之意繼自今以後若時加修飭俾勿壞則為政者有所矜式而吏民亦悅服而易治是真有補于風教者其可不書以告後之人

華陽趙侯祠堂記

楊天惠

吾里有仁焉銅山趙侯純祐名申錫本故家子有美才數試吏以能聞于人繇州縣三陟奉議郎知華陽縣華陽隸成都其治直府城中央戶版夥繁訟獄紛委固倍餘邑又與尹廷四五行臺纒連錯峙勢相關制難于專

達趙侯獨富風力敏功緒遇聲認事尤喜為之縣故有  
沙坎堰不知起于何人凡溉田三萬七百九十畝頗沃  
美然歲月猥深官不時省堰浸埋缺江流亦遷去田因  
以廢夷在草間雖世業者尚棄弗顧而浮客尤輕亡徒  
不可留以故公租歲閣一千餘緡省賦歲閣四百餘緡  
而私獲之闕在歲侯至則喟曰曩輸入而今不入曩

獲美而今無餘豈終不可為耶為而新之豈不在我由  
是訪遺迹按故道叅校圖錄訂以耆舊遂相地宜築堤

故處高二十五尺長四百四十尺其址之濶如高之數  
用木五百章捷竹二萬箇役夫五萬指不決旬功告就  
水即赴溝支分派別油油宛宛醲灌如初時願復故業  
者願就新廬者挾牘自言惟恐人先銓耒交起塍壠飭  
治土膏和美秔稻奮張于是草萊畢溉而洳有賸流人  
曰是非水泉之利也侯實利我賦租迄入而私有衍藏  
人曰是非田租之賜也侯實賜我乃即堰側構新堂乃  
圖侯像于其中曰使世世子孫無侯忘也間走人過余

求為之記余觀魏史起論西門豹不能美鄴田為不仁不知引漳水為不智豹賢令也其治鄴使人不敢欺當時無及焉者亶以一不圖之蒙不仁不智之名後世不以為過及起繼之卒能化烏鹵生稻粱為鄴人所歌誠賢于豹遠甚今侯風力如是功緒如是假令與豹易地與起並時吾知河內之績不在起在侯無疑也非直賢于豹而已頃者侯治廳廡得斷碑壁下蓋前令趙世長種柳詩也其自叙嘗從平崖行柳安轡昇僊橋上隨而



觀者數千人，垂崖號曰：此趙公手植也。宜呼曰趙公柳。人咸應曰：然。侯讀之，及半，忽驚寤，髣髴其疇昔所為。遽拓本示余，且言當復種柳以竟趙公故事。然侯方從辟書佐漕幕，柳之種否未可知。余欲寄聲父老，幸為侯植五株堂旁，勿翦勿伐，以永侯愛思。宜有益父老，其聽余言。毋忽。政和元年記。

韓忠憲公祠堂記

閻灝

自侯國為郡縣，傳記始有列循吏者，固須凜德讓風迹。

清慎所居民富既去見思生有榮號歿得奉祀則其章  
明與日月參光而無窮已也漢元始詔書祀百辟卿士  
有益于民者蜀郡以文翁九江以召父應詔歲時郡二  
千石率官屬行禮而南陽亦為信臣立祠昭然史策增  
媿赤制此典一墜昧沒千載然而有碩德傑望矜式薦  
紳厚澤英績周洽民俗丕烜瑰偉自與禮之法施于民  
以勞定國者合而與心稱願以祈薦饗則此甚盛事可  
得已耶宋天聖中韓忠憲公以樞密學士諫議大夫鎮

成都威靖仁涵內外誠盡方嚴正直動循儀矩中心樂  
易以教化為首務俗尚悛阜安趨夷達始日官以蜀當  
有兵變夷大沴為言者朝廷憂之公于陞辭之日二宮  
諭以占說公俯伏曰願以屬臣既至蜀果大旱炎暘午  
熾狼顧駭駭素寡儲峙生意潛奪公齋咨惻憂形見顏  
表遽發倉廩粟及令富室造饘粥以賑救餓殍日自循  
徃按涖之撫慰噢咻率繇淵誠賴以獲全者不翅千萬  
始議救災也僚有請限節米價者公曰不可物始翔踊

居蓄者固靳嗇以射利祈倍稱之息此令一出環千里之粟閉不至矣姑待之不決日諸郡之輦餽大至價遂少損公嘗于中夕端肅衣冠祈請帝神霖雨如注焦槁以蘇斥絕宴嬉還集疲瘵捐瘠完好武斷縮慄易荒為穰化擾為寧或言張乖崖歲出米萬斛估于民頗漁庾實白請減之公曰此朝廷所以濡澤遠人為最急者豈可輕議耶因前期倍數以給價之且刻石置倉中示後人不可草之意陽亢寢久府江幾涸時稼將瘁溝澮填

關提封曠然澆潤靡及公遂遣官行視江流訪故老得  
堰曰九外口未始疏導即命新醱為渠以注之水行徑  
便均溉諸邑後常修決倚為滋植而利甚豐博蜀之戍  
兵舊比食淡公損鹽估差等而鬻予之著為定令新繁  
彭益之交舊匿奸寇賊有閃地黃之號公行剽殺蒙隱  
逾時公廉知之鉤發逮捕得罪狀誅竄渠支清洗胥篋  
至今新繁無盜公敦尚儒雅平日誘進文士以倡教育  
會詔秋貢士公戒有司務公其選躬視精覈擢章君陳

為舉首章遂登甲科後立朝為聞人餘忠時之髦彥接武以取名第西南文章基此而盛藩會燕饗往皆趨佛宮廡下蒞具秋底庖宰擾雜公飭材于廣庭為廳事以宏豐鎬之地遠去封割表揭瞻望方隅偉之踰再期會以御史中丞召還蜀民慊悃如失慈哺公歸朝尚以邛部蠻馬歲來鬻于永康經踐山川知道途險夷為蜀後日虞建言願徙即沈黎朝廷從之遂得杜覘伺之便嗚呼何于蜀之恩始終隆隆耶踰三十年袴襦之歌頌不

衰天福于遐世象其賢上復用公第三子端明殿學士翰林侍讀學士尚書禮部侍郎公繼治之追功席休踐脩厥猷紹叅神明今昔相照官榮家範古所未有德威亶白歲時大和于是耄耆善良會千百數擁祭戟門道前世祀事謂忠憲公之祠不修為蜀之愧願即文翁廟之南宇為一室繪犀日之表而以端明公侍其旁庶西南人事之無窮以大朝廷用世德之盛其不可辭端明公曰衆之請至矣矧利義無疑遂許之而止其圖已像

堂序樸嚴繪事莊潔毅如嶽鎮煥如星辰憑憑威靈萬  
世瞻仰既已邦人士大夫謂灝竊穎宮之遊日與諸生  
道古今盛美宜紀其實從金石刻灝再拜受命而系以  
詩曰

惟宋受命繼古聖聖弼臣舉夔世載德盛嚴嚴韓公  
有倬其道方國碩望朝廷元老天聖之末蜀人荐飢  
公竭惠慈營營百為厚恩春暘凜威秋霜善惡判明  
納民安康始三十年世象其賢公功愈昭斗奎于天



蜀之父老百拜庭下願修公祠以永瞻慕岷盤坤維  
江紀南國公祠之嚴相與無極漢之文翁宋之韓公  
邦人永懷穆然清風

司馬溫公祠堂記

張行成

故諫議大夫司馬君池以其年作尉郾邑越明年某月  
生公于官廨字之曰岷以山稱也是歲諫議君手植松  
栴各一本于庭迨今凡若而年自諫議之死骨已朽矣  
公相繼衰落靈亦歸矣而二本之中其一松者亦枯摧

矣惟是茲柎蒼蒼雲表人依之尚可想見公初生時也  
公之遺德在天下名在後世行業在國史固一代偉人  
也當其道未合之初天子敬之而不用權臣憚之而不  
親天下仰之而不齊不獨其身見黜于朝廷波及遺言  
窮于死後者凡數十載則松之不受而柎之不錄固其  
宜也邇來世道頓草士風漸回上自朝廷下自黎庶咸  
知公議之不可破而公之言為不可抑于是朝廷旌其  
家學士誦其書後生想像其風采而不可得則又丹青

肖形以寫瞻慕者無室不有公之道蓋大明于天下矣  
思其人愛其樹又理之必然者于是邑丞李公作堂以  
嚴公之祭植木以永公之思蓋從人望者柟之青青公  
生在茲邦人是榮祠之翼翼公像在茲後生是式公之  
道彰矣不假于一柟而茲柟實託公以不朽公之道傳  
矣不私于一室而茲邑實賴公以不辱柟之喬斤焉而  
雕惟公之道磨天地而不銷柟之節斧焉而缺惟公之  
道涸河海而不竭則茲堂之建非以嚴公也乃以為護

柵之標榜茲柵之愛非以榮公也乃以榮邑之冠冕堂  
之毀公不毀也柵則毀矣柵之辱公不辱也邾則辱矣  
嗟乎邾之民邾之吏繼今而後者其善護茲

寇萊公祠堂記

鄭銓

府城之東有廟曰見報司者故太子太師萊國寇忠愍  
公之祠堂也廟初本澄覺院治平二年賜名正覺勅書  
存焉院初為十方有禪師曰可居自雲頂來住持因塑  
公像與雲頂山之神曰利國王者並祠于院之東偏歲

既久鄉人事之頗著靈異民相與質其曲直報輒如響  
遂呼為見報司今雖有僧居之而院實廢為廟矣見報  
司之說頗不經而傳之既久又不能廢然為善為惡使  
民知有所報則存之足以示勸戒亦不必廢也紹興甲  
子廟將壞里人徐復與院僧圓證率好事者再新之改  
前日之佛宮為萊公之祠萊公始正離明之位前為兩  
廡其東廡開一位以祠利國王其西廡則增塑神像以  
居之祠堂之後為齋廳乃往時之法堂又改方丈為清

遠堂以備僧徒道場僧房齋庖皆備視前日規模不復然矣復思歲月寢久人弗知興起之由屬予記之予既為誌其詳矣按成都古今記正覺院與見報司俱不載惟前記祭祀門有王者八而利國王在焉有公者十而寇萊公在焉前記乃趙清獻公所集當時既載祀典則廟與院不宜俱失續記乃王公時享所修而廟宇寺院門亦不錄故鮮有得其詳者春秋之祀官並祭萊公與利國王甚久又未知自何人始也今述其重修之因以

貽來者若萊公之遺德則有國史在茲不復出也然則  
生而聰明正直有功德于民死而祀之固宜况事有足  
以起人之敬而生其良心亦何嫌而不書之哉

顏魯公祠堂記

馬存

上元中顏魯公為蓬州長史過新政作離堆記四百餘  
言書而刻之石壁上字徑三寸雖崩壞剝裂之餘而典  
刑具在使人見之凜然也元符二年余友強叔來尹是  
邑始為公作祠堂于其側而求文以為記嘗謂仁之勝

不仁久矣然有時乎不勝焉命也史臣論公晚節偃蹇  
為奸臣所擠見殞賊手是未必然公孫丞相以仲舒相  
膠西梁冀以張綱守廣陵李逢吉以韓愈使鎮州而盧  
杞以公使希烈其用意正相類爾然數公終無所傷而  
公獨不免于虎口由是觀之士之成敗存亡豈不有命  
邪而小人軒然自以為得計不其謬乎吾聞之古之尚  
友者以友天下之善士為未足又尚論古之人誦其詩  
讀其書思見其人而不可得則方且招屈子于江濱起



士會于九原蓋志之所願則超然慕之于數千百載之後况公之功名事業已超于人而文學之妙亦不可及顧其名書之所在而祠之此昔尚友之意也嘗試與强叔登離堆探石室觀其遺踪而有味于平生則公之精神風采猶可以想見也

賈浪仙祠堂記

龔鼎

唐韓退之善為歌詩導性情一時相從者如孟郊張籍最號友善而浪仙學詩于劉义晚得偕與二子遊頗以

才調相推高雖然觀其風致清澹得之自然誠亦郊籍之儔故後世學者語騷雅之流裔孰敢外三子焉浪仙由長江徙官于安岳而卒于會昌三年凡為編次其詩者二人許彬者謂之小集而天仙寺浮屠無可謂之天仙集當時之人有可名者島俱請之讚天仙集傳之既久反以讚為退之之辭然退之前後二集皆所不載及得李洞白圖序質之然後信其非也浪仙于舊史無傳邇來朝廷新其書遂得附名于退之之後而頃歲居官

者署祠堂于蜀土神廟廡之次今伯氏實佐令長于是  
邑嘗議其堂雜與人居非所宜也而尉有西圃者在唐  
為主簿之廨址誠將遷其舊備更以繪像無撓邑人于  
義何有既遂經畫而就之其屋不華而完其地不輿而  
清越其兩傍封植筠柏鬱然嗚呼浪仙沒距今二百二  
十餘歲矣名始著于史冊而其遺貌又得宅于故處迺  
知士之能蹈善雖日月之遠必有為黼黻其迹者今幸  
赴其身後之所將有以傳之無窮宜無復恨矣而伯氏

遠以書諭俾文其實然而蹈前哲之為啟來者之慕抑  
所願聞即為取諸昔日所傳而備存之且以示改作之  
有由也

新建宋丞相魏國張公父子祠堂碑記

明楊廷和

宋丞相魏國張公浚在中興號為賢相初逃張邦昌之  
議平苗劉之亂其風聲氣節已聳動天下既秉軸毅然  
以恢復自任誓欲攘夷狄鞠躬以清中原表著天心扶

持人紀引用賢俊英材授任四方人才視為進退天下  
覘其出處為安危忠君體國之誠直與諸葛孔明通于  
千百載上下雖困于讒忌屢起屢躓功未克就而志不  
少後厥嗣右文殿脩撰杖穎悟夙成魏公教之一以仁  
義忠孝之實又嘗遊胡五峯之門其為學惓惓于理欲  
之分義利之辨朱子與之遊以為卓然先有所見已非  
其匹學者稱為南軒先生嘗參贊魏國公諸所綜畫幕  
中人皆自以為不及魏公寢疾時手書諭南軒曰恨吾

不能恢復中原以雪祖宗之恥死不當歸塋先人墓左  
葬魚復下足矣乃葬之寧鄉瀟山之南後南軒卒亦祔  
葬焉至是蓋若干年矣坟墓所在鞠為榛莽土人父老  
亦鮮有知之者鳳陽胡士哀以明經進士補寧鄉令一年  
政通人和訪而得之憮然歎曰令凡忠臣烈士有功德  
于國家及惠愛在民事蹟昭著者列于其外夔人共祀  
墓禁人毀撤若魏公所建立載在信史昭如日月正應  
共祀之而南軒之學師表百世從祀孔廟達之天下今

其祠墓在一日若蕪穢不治非我有司之職而誰也于  
是亟取責贖之餘建觀其四楹其右則南軒書院又買  
田四十畝以備時享之用門廡外重以周垣俎豆載陳  
衣冠動色會衡山劉侍御蔽持節按蜀過修故悅之既  
至蜀以告予謂予魏公鄉後學也屬為文刻于神道碑  
下復檄下廣漢訪其遺脩予惟賢人君子之用于天下  
不患無才而患學術之不足不患無學而患所學之不  
正嘗觀魏公平日之所言如曰人主之學以心為主一

心合天何事不濟又曰所謂天者公理而已必兢兢自  
持使清明在躬則賞罰舉措無有不當歸敵讐自服其  
本原皆自聖賢學問中来非漢唐以下規規之末者比  
至南軒每進對必自盟于心其言曰此心之發即所存  
願時加省察而稽古親賢以自輔是即魏公之說也有  
名臣若仲淹之于純仁韓琦之于中彥呂夷簡之于公  
著前啟後承其詩書之澤事功之盛皆足以名當時而  
傳後世若學術議論視魏公之于南軒或有間也尚論



于魏公容有責備之意而其大處終不可泯予是以表  
而出之觀者幸勿以予為齊人侍御君思賢尚友而樂  
成人之美縣侯為政而急于先務皆可書也故以為記

四川制置安公生祠記

宋魏了翁

恭惟國家承百王之敝寓縣紛裂藩臣恣睢藝祖皇帝  
神武所運亂本旋弭以開億萬年無疆之基太宗道祇  
前訓卒其成功民生闡懌夷狄順軌真仁休養英廟纂  
承至熙豐物衆地大而竊儒為姦者乃始變亂典常元

祐更化綱目畢舉而紹熙以後黨禍再作極于崇觀政  
宣戎索弗戒乃底于亂高皇南狩駿惠先烈弘濟大難  
阜陵繼之勵精圖治志清全疆大勲未集而崇陵享國  
日淺肆開皇上克念厥紹始初清明率籲郡獻將有志  
于慶厯元祐之盛者天下延頸企踵以需太平而韓侂  
胄以居中竊弄威柄矣吳曦乳臭子耳依憑世資出入  
內閣侂胄既倚為心腹昇掌禁旅雖寵任踰涯而曦之  
為謀則蓋不在是也玠璘拱挺再世為將忌刻少恩志

鮮為用徒以積威之餘知有吳氏故曦密侂冑之欲而  
潛通于敵乘時為姦者士大夫繇學禁以來義理亦不  
競一旦利欲所熾則大官唱聲一口附和牢不可破凡  
以使命還自虜者例曰虜有內變虜有飢饉設王師一  
動關河必且響應是則然矣而不思侂冑之逞其私見  
也凡一時之躡登華要者鮮不出此雖廷策進士亦以  
是為舉首否則擯抑不容矣先是了翁蒙恩召試玉堂  
力陳其不可卒不見用明年將出師朝廷尚欲託之公

言以排異論遂建請宰執侍從兩省臺諫官條具否可  
來上爰暨管軍咸驛聞詔下中外各以已見條具獨曦  
不奉詔而遺書韓侂胄曰戒嚴有日忽出條具之命士  
心惑焉未知攸稟進退遲速願明降出處分彼既不論  
可否而反持短長欺侮侂胄得書惘然以失而公卿以  
下素為所心寄恬不知察不知識者已覘其無君之心  
迨郭倪李爽攻壽泗皇甫斌攻唐鄧雖皆覆軍亡將而  
還然尚有可庸者而曦悠悠不前不惟蓄溫裕之謀

蓋又出于石晉劉齊之陋策元帥既遁王人繼逐東歸之士蔽江而下至是所望以反正者惟蜀人耳志仁蹈道者固足以明人臣之義而潔身勇往弗顧全軀者依違其間下此者又置不復道方斯時也虜蹂我淮甸壞我襄安蕩搖我江漢顧瞻四方蹙蹙靡騁數州生聚遽隔王化此何時也悠悠風塵莫有能甘心于賊者視其汗鱗衣冠割截輿地駸駸然旦異而晡不同不過撫髀太息焉爾矣惟今資政殿大學士安公奮由儒雅獨能

周旋其間濡跡以就事部分既定即矯詔誅曦以聞泗州虜聞之以為從天而下也相與胆落神沮謂吾國中有人由是不敢有二心方反書之上也朝論大震上召羣臣計事咸謂無出公右乃為書賜公勉以圖曦報國書未至而捷聞君臣動色相慶以謂知人拜公端明殿大學士知沔州充州利州西路安撫使恩視執政亡何曦首至闕下詔禮官講行受俘之儀納于武庫凡皆國朝所未有也猗歟盛哉蜀人于公飲食必祝蓋公之

祠徧蜀中而公廣安人也。和溪縣封山鎮亦公之鄉也。顧獨闕焉。未有以識高山之仰其鄉之士曰陳農孫重公之德。乃肖厥像而走廣漢。介通守李君炎震欲得余文以識顛末。余惟公殊尤絕異之績垂之史冊。鏤之玉板。被之金石者。何可勝數。尚安以余言為也。而固請弗已。則三復其事。為之喟然歎曰。天之生人久矣。一治一亂。非以氣數屈信之變。人事昏明之異。故反覆靡盪。所不容不爾耶。然天之愛人也。屈于前必有信于後。消于彼。

必息于此使生民之類猶有所依以自立而不至于極  
弊大壞則以天下固生才以待其定也夷吾不死以康  
天下絳侯屈意以安劉氏方事之未白也有友如鮑叔  
有君如高帝固以是望之彼亦以是自信不疑是惡可  
強而致然耶賊曦之變公雖以天下為己任始焉自晦





全蜀藝文志卷三十七